

**НЕДЕЛЯ ПЕРВАЯ СВЯТАГО ПОСТА**  
**В НЮЖЕ ПРАВОСЛАВИЕ ВОСПОМИНАЕТСЯ**  
**В СУББОТУ ВЕЧЕРА, НА МАЛЕЙ ВЕЧЕРНИ**

На Господи воззвах Поставим стихи 4. Творение Николаа,

Глас 1.

Подобен: Небесных чинов:

**Н**ыне благочестия светлость всем распростресе, \* разгоняющи лесь нечестия яко облак, \* просвещающи же сердца благочестивых: \* приидите вси припадем, \* благочестивомудренно честным иконам Христовым \* покланяющесе православнии.

**С**вященнообразными иконами ныне украшается, \* яко невеста украшена Христова Церковь, \* и всех созывает духовно праздновати: \* снидемся во единомыслии и вере, \* радостно величающе Господа.

**М**ире весь веселися: \* се бо Господь низложи с высоты \* нечестия державу неизреченным промышлением. \* И смиреннии вознесохомся днесь к вере православия, \* благочестивою царицею наставляеми.

**К** первообразному носитя, \* глаголет Василий, честь иконы: \* сего ради в любви почитаем иконы Спаса Христа, \* и святых всех: \* да сих собравше, \* никогдаже ныне злочестием отведемся.

Слава, и ныне:

Богородичен. Подобен:

**Б**езначальным, и Божественным естеством невидимый, \* Человек виден бысть Отроковице, \* от чистых Твоих кровей, \* за крайнее благоутробие: \* Егоже плоти написавше подобие, \* честно покланяемся вси вернии, \* и благочестно величаем.

На стиховне, глас 2.

Подобен: Доме Евфрафов:

**Г**убительства тлетворнаго \* избегше злославных, \* православия сиянием, \* сердцами просветимся \* вернии Бога славяще.

**Стих: Принесите Господеву честь и славу.**

**А**риева нечистая \* упразднися прелесть, \* Македония, Петра, Севира же \* и Пирра: \* и светит Свет трисолнечный.

**Стих: Поклонитесь Ему во дворе святем Его.**

**Н**е кому злочестивых \* похваляется мрачное учение: \* Бог бо православным, \* изволением Феодоры, \* жезл крепости дает.

Слава, и ныне, Богородичен.

**Подобен: Доме Евфрафов:**

**В**ознесла еси \* смиренных рог Богородице, \* рождающая Бога Слова: \* темже верно Тя вси чтуще \* величаем.

**Тропарь, глас 2:**

**П**речистому образу Твоему поклоняемся Благий, \* просяще прощения прегрешений наших Христе Боже: \* волею бо благоволил еси плотию взыти на Крест, \* да избавиши, яже создал еси, от работы вражия. \* Тем благодарственно воишем Ти: \* радости исполнил еси вся Спасе наш, пришедый спасти мир.

**И бывает отпуст.**

## НА ВЕЛИЦЕЙ ВЕЧЕРНИ,

По обычном стихословии, Господи возвах, на глас Осмогласника, поставим стихов  
10:

Триоди подобны 4. Глас 6:

Подобен: Всю отложивше:

**Т**я непостижимаго, \* прежде денницы безначально \* из Невещественнаго возсиявшаго, \* безплотнаго же чрева Родителя, \* пророцы Господи, \* Твоим Духом вдохновени, \* прорекоша Отроча быти, \* из Неискусобрачнаго воплощаема, \* человеком совокупаема, \* и сущими на земли зрима: \* имиже яко щедрый просвещения \* сподоби Твоего, воспевающих неизреченное, \* и честное Твое Воскресение.

**С**ловом Тя проповедавшии \* богоглаголиви пророцы, \* и дела почетшии, \* безконечную жизнь приплодиша: \* твари бо Владыко, паче Тебе Содетеля, \* служити не претерпевше, \* мира всего евангельски отвратишася, \* и сообразни быша страсти Твоей, \* юже провозвестиша: \* ихже молитвами, \* сподоби непорочно прейти \* воздержания поприще, \* едине Многомилостиве.

**Е**стеством неописанный Божественным Твоим сый, \* на последняя Владыко воплощься, \* изволил еси описоватися: \* плоти бо прияти, \* и свойства вся сея взял еси. \* Темже вид Твой образования \* описующии любезно целуем, \* к Твоей любви возвышаеми, \* и исцелений благодать почерпаем из него, \* апостольским последующе Божественным преданием.

**П**речестное украшение Христова Церковь, \* честных прият и святых икон, \* Спаса Христа и Богоматере, \* и всех святых светлейшее возставление, \* имиже просвещается, \* и красуется благодатию, \* и сонмище отлагает еретическое изгонящи: \* и радуящися славит человеколюбца Бога, \* ея ради претерпевша страсти вольныя.

Слава, Триоди, глас 2:

**Б**лагодать возсия истины, \* прообразуя древле сеновно, \* ныне явленно скончася: \* се бо Церковь воплощенным образом Христовым, \* яко прекрасною утварию облачится, \* скинии свидения образ пронаписующи, \* и православную веру содержащи: \* да егоже почитаем, \* сего и образ держаще, \* не прельщаемся, да облечутся \* в студ сице неверующии: \* нам бо слава зрак Воплотившагося \* благочестно покланяемый, \* не боготворимый. \* Той облобызающе вернии возопиим: \* Боже, спаси люди Твоя, и благослови достояние Твое.

И ныне, Богородичен, гласа.

На литии

**Слава, Триоди, глас 2:**

**Р**адуйтесь пророцы честнии, \* закон Господень добре учинившии, \* и верою явльшиися необоримии \* столпи неуклоннии: \* вы бо и ходатаи явистесь \* Новаго Завета Христова, \* и преставившесь на небеса. \* Того молитесь, \* умирить мир, \* и спасти души наша.

**И ныне, Богородичен, глас тойже:**

Все упование мое на Тя возлагаю, \* Мати Божия, \ сохрани мя под кровом Твоим.

**На стиховне стихиры воскресны, глас 4:**

**Слава, Триоди, глас 2:**

**И**з нечестия во благочестие прешедше, \* и светом разума просветившесь, \* псаломски руками восплеши, \* благодарственно хвалу Богу приносяще: \* и на стенах, и дсках, \* и на священных сосудех, \* начертанным священным образом Христовым, \* и Пречистыя, и всех святых, \* честно поклонимся, \* отлагающе злочестную злославную веру: \* честь бо образа, якоже глаголет Василий, \* на первообразное переходит, \* просяще молитвами Пречистыя Твоея Матере, \* Христе Боже наш, \* и всех святых, \* даровати нам велию милость.

**И ныне, Богородичен:**

**О**, чудесе новаго всех древних чудес! \* кто бо позна Матерь без мужа рождающую, \* и на руку носящую, всю тварь содержащую; \* Божие есть изволение, рождающееся. \* Егоже яко младенца, Пречистая, \* Твоима руками носившая, \* и Матерне дерзновение к нему имущая, \* не престай молящи о чтущих Тя, \ ущедрити и спасти души наша.

**Тропарь: Богородице Дево радуйся: [дважды]**

**Тропарь Единожды, Глас 2:**

**П**речистому образу Твоему поклоняемся Благий, \* просяще прощения прегрешений наших Христе Боже: \* волею бо благоволил еси плотию взыти на Крест, \* да избавиши, яже создал еси, от работы вражия. \* Тем благодарственно вопием Ти: \* радости исполнил еси вся Спасе наш, пришедый спасти мир.

**И прочее последование бдения.**

## НА УТРЕНИ,

На Бог Господь, тропарь воскресен, Гласа [дважды]

Слава, Триоди, глас 2:

**Пречистому** образу Твоему поклоняемся Благий, \* просяще прощения прегрешений наших Христе Боже: \* волею бо благоволил еси плотию взыти на Крест, \* да избавиши, яже создал еси, от работы вражия. \* Тем благодарственно вопием Ти: \* радости исполнил еси вся Спасе наш, пришедый спасти мир.

**И ныне, Богородичен, по гласу тропаря:**

Вся паче смысла, \* вся преславная Твоя, Богородице, таинства, \* чистоте запечатанной и девству храниму, \* Мати позналася еси неложна, \* Бога рождши истиннаго: Того моли спастися душам нашим.

**И обычное стихословие: и прочее последование.**

**По 1-м и 2-м стихословии седальны воскресны, гласа:**

**И полиелей. Степенны гласа. Прокимен, и Евангелие утреннее рядовое. псалом 50.**

**Слава, глас 8:** Покаяния отверзи ми двери Жизнодавче, \* утренюет бо дух мой ко храму святому Твоему, \* храм носяй телесный весь осквернен: \* но яко щедр, очисти \* благоутробною Твоею милостию.

**И ныне, Богородичен:** На спасения стези настави мя Богородице, \* студными бо окалях душу грехми, \* и в лености все житие мое иждих: \* но Твоими молитвами \* избави мя от всякия нечистоты.

**Таже, глас 6:** Помилуй мя Боже, \* по велицей милости Твоей, \* и по множеству щедрот Твоих, \* очисти беззаконие мое.

**Множества** содеянных мною лютых, \* помышляя окаянный, \* трепещу страшнаго дне суднаго: \* но надеяся на милость благоутробия Твоего, \* яко Давид вопию Ти: \* помилуй мя Боже по велицей Твоей милости.

**И канон воскресен, и Богородицы на 6: и Триоди на 8.**

**Песнь 1.**

**Ирмос:** Моря чермную пучину \* невлажными стопами \* древний пешешествовав Израиль, \* крестообразными Моисеовыми руками, \* Амаликову силу в пустыни победил есть.

**Плещуще** с веселием днесь вернии возопиим: коль чудна дела Твоя Христе, и велика сила, наше единомыслие и согласие соделавый!

**День** радостный богомудрении приидите совершим, ныне небо и земля веселится, и ангелов чини, и человеков собрания изрядно празднующе.

**Превелие** благодяние видяще, руками восплещим: разстоящияся уды Христовы, совокуплены во единство, и Бога похвалим мир подавшаго.

Дашася Церкви днесь победительная, Богодвижным мановением и советом, Михаила же и Феодоры, благочестно веру содержащих царей наших.

**Богородичен:** Оружия злочестивых исчезоша яве ересей: храм бо Твой Пречистая Чистая, во образех украшаемый всеблагословно зряще, ныне всесвященно радуемся.

**Катавасия:** Моря чермную пучину \* невлажными стопами \* древний пешешествовав Израиль, \* крестообразными Моисеевыми руками, \* Амаликову силу в пустыни победил есть.

### Песнь 3.

**Ирмос:** Веселится о Тебе Церковь Твоя Христе, зовущи: \* Ты моя крепость Господи, \* и прибежище, и утверждение.

Не кому нечестивых еретиков ныне бровь вземлетя: Божия бо сила православие удержала есть.

Облацы пророчестии, животворящую с небесе днесь росу нам да кропят, на востание веры.

Благогласно тайныя апостолов Христовых трубы, паче естества да вопиют, честных образов исправление.

Воспоим Христа, показавшаго нам царицу благочестивую, христоролюбивую, с Боговенчанною отраслюю.

**Богородичен:** Селение Твое священное достигше вернии, Пречистая, световидною благодатию ныне озаритися, молимся.

**Катавасия:** Веселится о Тебе Церковь Твоя Христе, зовущи: \* Ты моя крепость Господи, \* и прибежище, и утверждение.

### Подобен: Лик ангельский:

Божественный Твой зрак, \* во образе образующе Христе, \* ясно вопием Рождество, \* чудеса неизглаголанная, \* вольное распятие. \* Отонудуже бесове отгонятся страхом, \* и злославнии в посуплении рыдают, \* яко сих сопричастницы.

**Слава:** Зраками пророков, апостолов видами, мучеников священных, и святых всех иконами, и изображеньми священно красуется: Жениха же мысленнаго и невесты украшается умными красованьми, мати вышний Сион.

И ныне, **Богородичен:** Любовию Чистая, Твою святую икону почитающим, и Божию Тя Истинную Матерь согласно возвещающим, и верно покланяющимся Ти, Хранительница явилася еси, и державное Предстательство, отвращающи всякое лютое далече сих, яко вся могущая.

### Песнь 4.

**Ирмос:** Вознесена Тя видевши Церковь на Кресте, \* солнце праведное, \* ста в чине своем, \* достойно зывающи: \* слава силе Твоей Господи.

Найдем Божественным Утешителя, Твой храм освяти, и пришествием Сего еретическую прелесть отжени, Слове Божий многомилостиве.

Нужнейшего избавивый злочестия Твоя люди, покажи благочестия ревностию разжжены, и верою зывающия: слава силе Твоей Господи.

Священнообразными изображеньми, образов Христовых зряще и Богородицы, сияющая Божественная селения, священнолепно радуемся.

Царица по обоему украшена, истиннаго возжелевши Христова Царства, Сего написа образ пречистый, и святых изображения.

**Богородичен:** Воплощенна родивши Божественнаго Слова, Боголепное освящение Благодатная, Сего показала еси: темже Твой храм световидный обновляем.

**Катавасия:** Вознесена Тя видевши Церковь на Кресте, \* солнце праведное, \* ста в чине своем, \* достойно зывающа: \* слава силе Твоей Господи.

#### Песнь 5.

**Ирмос:** Ты Господи мой, \* Свет в мир пришел еси. \* Свет Святыи, обращай из мрачна неведения, \* верою воспевающих Тя.

Положи Господи Твоей Церкви утверждение, непреклонней пребыти в век века от смятений ересей.

Во всю землю светлость возсия свыше, даннаго верным веселия, и Божественнаго заступления.

Едине Благий, и источниче благодати, Ты возвыси православных рог, чтущих образ Твой.

Свет незаходимый нам благочестия возсия, велением Богодухновенным верных пастырей, и манием Богомудрым.

**Богородичен:** Обнови нам древнее благолепие, Пречистая Богомати, и дом Твой сей освяти Твоею благодатию.

**Катавасия:** Ты Господи мой, \* Свет в мир пришел еси. \* Свет Святыи, обращай из мрачна неведения, \* верою воспевающих Тя.

#### Песнь 6.

**Ирмос:** Пожру Ти со гласом хваления Господи, \* Церковь вопиет Ти, \* от бесовския крове очищися, \* ради милости от ребр Твоих истекшею кровию.

Пишется и почитается верно покланяемый образ Владыки, и приемлет паки Церковь дерзновение, благочестно Спаса прославляюща.

Обнажается сетования, и тьмы ересей Христова Церковь, и носит ризу веселия, и Божественною и светоносною покрывается благодатию.

Благославия древняго осияния получи православных собор, Феодоры мановением царицы, и ея сына благочестиваго Михаила самодержца.

**Богородичен:** Древле свидения повелевый быти скинии: яко в скинии словесней, в Тебе живет Един Препрославленный, прославляяй храм Твой Дево чудесы.

**Катавасия:** Пожру Ти со гласом хваления Господи, \* Церковь вопиет Ти, \* от бесовския крове очищися, \* ради милости от ребр Твоих истекшею кровию.

**Кондак Триоди, глас 2. Самогласен:**

Неописанное Слово Отчее, \* из Тебе Богородице описася воплощаемь: \* и осквернившийся образ в древнее вообразив, \* Божественною добротою смеси. \* Но исповедающе спасение, \* делом и словом, \* сие воображаем.

**Икос:** Сие смотрения таинство, древле пророцы Боговидно вдохновени бывше, нас ради в концы веков достигших предвозвестиша, получивше сего сияния. Разум убо Божественный от него взявше, Единого Господа Бога знаем, в триех Ипостасех покланяемого: и Тому единому служаще, едину веру, и едино крещение имуще, во Христа obleкохомся: но исповедающе спасение, делом и словом, сие воображаем.

**Синаксарь.**

**Стих:** Нелепотно изметаемы иконы:

**Стих:** Радуюся лепотно покланяемы видя:

**В** сий день, в Неделю первую святых постов православия, сиречь возставление святых и честных икон, Церковь Христова праздновати прият, бывшее от Михаила и Феодоры святых и блаженнейших царицы, и святого Мефодия, патриарха Константинопольскаго, бысть же сице: Льву Исавру из ослятогонения, и свинопаственнаго жития, скиптры царствия удержавшу по Божию попущению. Во святых Герман тогда кормила церковная объем, абие призывается от онаго, и слышит: яко мне мнится владыко, святым иконам ничтоже разнствовать от идолов, повели убо елика скоро извести сия от среды. Аще истиннии суть святых зрацы, но вышше да повесятся, да не со грехи валяющесе, сия всегда оскверняем целующе. Патриарх же толикыя мерзости царя отвращаше, не ты ли, глаголя, о царю, бесновати убо некоему некогда на святых иконы слышим, Конону же быти его проименованию? Он же, но аз, глаголет еще младенец сый нарицахся. Не повинующуюся же убо послушати его патриарху, изгна его, и единомудренна себе возпоставляет Анастасия: и тако тогда со святыми иконами брань нача являти. Глаголется же, евреем прежде таковую ненависть ему подложити, от некоего волшебства предрекшим на царство возведение, внегда убог сый, с ними ослятогонением жити веществоваше. Оному же зле житие отторгшу, из онаго суровейший скимен, Копроним Константин, начальства, наипаче же на святых иконы беснования преемник бывает. И что подобает глаголати, елика и якова и сей незаконный содела, но обаче и оному студнейше скончавшуся. От хазары сын онаго на царство поставляется, понеже и той еже жити зле измери. Ирина и Константин начальства наследницы бывают. Сии от Тарасия святейшаго патриарха наставляеми, седьмый собор собирают, и святых иконы паки Христова Церковь приемлет: сим же царство отложшим, от Геника Никифор возводится. Таже Ставрикий, посем Михаил Рагкавей, Божественныя иконы чтуще. Михаила зверовидный Лев Арменин

преемлет: иже от монаха некоего затворника, и злочестиваго, лестию растлевся, второе иконоборство воздвизает: и паки безлепотна Божия Церковь показуется. Сего Аморрей преемлет Михаил: тогоже паки сын Феофил, на иконы неистовство, прочия во вторых полагающе. Сей убо Феофил многия от святых отец томлением и мукам различным предав, о иконах честных, правду тогда наипаче усвоише, яко взыскаше: аще кто есть во граде, крамолю другому бываемь, ни единого на многи дни, яко глаголют, обрести. И дванадесяте лет самодовольствовав, и чревным недугом объят быв, расторгнутися хотяше от живота: уста его презельно отверзошася, якоже и самем утробам внутренним явитися. Царица же Феодора болезненна о приключившемся бывши, едва ко сну обращается: и во сне виде Пречистую Богородицу, Младенца объемшу Превечнаго, обстоиму пресветлыми ангелы: Феофила же сея мужа от тех биема, и уничижаема. Яко убо отыде от нея сон, и Феофил мало в себе пришед, возопи: увы мне окаянному, святых ради икон биен есмь. Абие полагает верху его царица Богородичный образ, молящися Сей со слезами. Феофил убо сице имый, виде некоего от предстоящих носяща егколпий [нанедренник], похитив от него, облобызаше. И абие на иконы шатавшаяся уста, и безстыдно зинувый гортань, в первый чин устрашася, и от содержащая беды и нужды преста и усну, быти исповедав добро святых иконы почитати. Изнесши убо царица от своих ковчезцов святых и честных образы лобызати, и всею душею почитати Феофила устраше. Помале убо исчезает от жития сего Феофил. Феодора же сущих во изгнаниих и в темницах всех воззвавши, свободне пребывати повеле. И низвергается убо от патриаршескаго престола Иоанн, иже и Аннис, волхвоначальник, и бесоначальник наипаче, нежели патриарх. Христов же исповедник Мефодий восходит на престол, многа пострадав прежде, и во гробе жив затворен бысть. Сим же тако имущим, посещение некое бывает Божественное Иоанникию великому, во Олимбовех горах обучававшемуся. Великий убо постник Арслакий пришед к нему глагола: Бог мя к тебе посла, яко да к преподобному мужу Исаии затворнику в Никомидию пришедше, от него научимся, елика суть любовна Богу, и прикладна его Церкви. И убо к преподобному Исаии пришедше, слышат от него: тако глаголет Господь, се приближися конец врагом Моего изображения, вы убо к царице Феодоре, но и к патриарху Мефодию шедше, рцйте сице: остави вся не священныя, и тако со ангелы жертву Мне принесеши, зрака Моего образ и Креста почитай. Сия услышавше, в Константинь град абие достигают, и реченная Мефодию патриарху, и избранным всем Божиим возвещают. Собравшися же к царице переходят, и покорну сию во всех обретают: от отец бо бяше благочестива и Боголюбива. Абие убо царица Богородичный образ на выи обвешаемый изнесши, всем зрящим: лобзаше глаголющи: аще кто сим не покланяется, и не целует любезне, не служебне, не яко боги, но яко образы, первообразных ради любве: буди проклят. Они же великою радостию возрадовашася. Противу же просит и сия от них, яко да бы моление о муже ея Феофиле сотворили. Они же веру ея видевши, аще и отрицающася, обаче же повинуются. Ибо во святых Мефодий патриарх люди вся собрав, и причет весь и архиереи, в великую Божию церковь тамо приходят. В нихже бяху избранныи сии: из Олимба великий Иоанникий, и Арсакий, Навкратий же, и ученицы Феодора

Студита, и великаго села Феофан, и Феодор писаннии, и исповедницы: Михаил Святоградец, и Сигтел, и инии множайшии, моление всенощное к Богу сотворяют о Феофиле, всем молящимся со слезами, и протяженным молением: и сие во всю первую седмицу постов совершашеся, и самой царице Феодоре подобне с женами, и прочими людьми содевающи. Сим же сице имущим, Феодора царица о утре озаряющим пятка на сон обращшия, возмне обрестися у столпа крестнаго, и некоторыя с шумом проходити путь, различная мучительная орудия носящия виде: посреде же сих ведома связана и царя Феофила, создаи связанныма руками: сего же познавши, последоваше и та с ведущими. Егда же до медяных врат достигоша, виде преестественным видением, мужа некоего сядяща пред образом Христовым, егоже противу Феофила поставиша: сего же ногам прикоснувшись царица, о царе моляшеся. Он же едва отверзл уста, велия твоя вера, жено, глаголет: разумей убо, яко слез ради твоих и веры, еще же и ради прошения и моления рабов Моих, и священников Моих, прощение даю мужу твоему Феофилу. Таже глаголет ведущим: разрешите его, и предадите жене его. Она же взявши сего, отступи веселящися и радующися: и абие ю сон остави. Сия убо Феодора царица виде. Патриарх же Мефодий, молитвам и молением бываемым о нем, хартию нову взем, написа в ней всех еретиков царей имена, вчинив и того Феофила, и под святою трапезою взем вся положи. О пятце же видит и той некоего ангела страшна великаго, входяща во храм, и к нему пришедша рещи, глаголется: услышася моление твое епископе, и прощение получи царь Феофил, не ктому убо прочее о сем стужай Божеству. Он же искушая, аще истинно есть видимое, от места своего спешд, и хартию взем, и развив, обрете, о Божиих судьб! заглажено от Бога всячески Феофилово имя. Сие уведевши царица, преобладовася зело, и к патриарху посылает, вся люди собрати с честными кресты, и со святыми образы, в великую церковь: яко да утварь святых образов сей отдастся, и новое Божие чудо всем познано будет. И убо всем вскоре в церковь собравшимся со свещами, и царица с сыном прииде. И литии тамо бывшей, со святыми иконами, и Божественными и честными древесы крестными, и священным и Божественным Евангелием, даже и до глаголемаго поприща изыдоша, Господи помилуй, взывающе. И тако паки в церковь возвратившеся, Божественную Литургию совершиша. Возставленным святым и честным иконам от предреченных святых мужей, проповеданным убо благочестивым и православящим: противным же и нечестующим, и святых икон чести не приемлющим, отреченным, и преданным проклятию. И оттоле определиша сии святии исповедницы, летному сице сему священному торжеству бывати, да не когда и паки в тожде злочестие впадем. Неизменный Образе Отчий, молитвами святых Твоих исповедников, помилуй нас. Аминь.

### Песнь 7.

**Ирмос:** В печи Авраамстии отроцы персидстей, \* любовию благочестия паче, \* нежели пламенем опаляеми взываху: \* благословен еси в храме славы Твоея Господи.

**Да** сликовствует церковней светлости любовию Божественною ангельское воинство, Богомудренно воспевающее: благословен еси в храме славы Твоя Господи.

**Церковь** перворожденных, и торжество радуется, зряще ныне божественныя люди, единомудренно воспевающая: благословен еси в храме славы Твоя Господи.

**Избавлени** прежде мрачныя ереси, манием Феодоры достолепныя царицы, воспеваем: благословен еси в храме славы Твоя Господи.

**Богородичен:** Паче вышних ликостояний, вознеслася еси Всечистая, едина бывши Мати Вседетеля. Радующеся убо зываем: благословенна Ты еси в женах, всенепорочная Владычице.

**Катавасия:** В пещи Авраамстии отроцы персидстей, \* любовию благочестия паче, \* нежели пламенем опаляеми зываху: \* благословен еси в храме славы Твоя Господи.

### Песнь 8.

**Ирмос:** Руце распростер Даниил, \* львов зияния в рове затче: \* огненную же силу угасиша, \* добродетелию препоясавшися, \* благочестия рачители отроцы, зывающе: \* благословите вся дела Господня Господа.

**Законы** Церкви отеческия сохраняюще, образы пишем, и лобзаим усты, и сердцем, и хотением Христовы, и Его святых, зовуще: благословите вся дела Господня Господа.

**На** первообразное яве образа, почеть и поклонение возносяще, чтим, Богоглаголивых учением последующе, и Христу верою зовем: благословите вся дела Господня Господа.

**Благословим** Отца, и Сына, и Святаго Духа, Господа.

**Ум** озаривши просвещением Божественнаго Духа, честная царица, плоды Богомудренныя имущи, благолепие возлюби Церкви Христовы, и красоту, благословящи купно с верными Иисуса Богочеловека.

**Богородичен:** Лучами света умнаго, освещаемый Божественный дом Твой, осеняет ныне всех облаком Духа, и освящает верныя согласно поющия: благословите вся дела Господня Господа.

**Хвалим, благословим, покланяемся** Господеви:

**Катавасия:** Руце распростер Даниил, \* львов зияния в рове затче: \* огненную же силу угасиша, \* добродетелию препоясавшися, \* благочестия рачители отроцы, зывающе: \* благословите вся дела Господня Господа.

На 9-й песни поем, Честнейшую:

### Песнь 9.

**Ирмос:** Камень нерукосечный \* от несекомья горы Тебе Дево, \*  
краеугольный отсечеса, \* Христос, совокупивый разстоящаяся естества. \* Тем  
веселящеса, \* Тя Богородице величаем.

Священнописаньми образов украшеную, зряще паки честную Церковь, со  
благоговением вси притецем и Богу возопиим: Тебе величаем Трисвятый.

Честь и славу стяжавши Церковь, Крест Твой и честныя иконы, и святых  
изображения, с веселием Владыко и радостию величает Тя.

Освети Божественною Твоею славою люди наши Щедрый, и ополченьми  
ангельскими, и всеоружествы сия огради, языков свирепство покаяря им Владыко.

**Богородичен:** Взятя праматере Евы осуждение Богородице, яко Ты всех  
Владыку несказанно Чистая родила еси: Егоже и ныне подобие на иконах целуем.

**Катавасия:** Камень нерукосечный \* от несекомья горы Тебе Дево, \*  
краеугольный отсечеса, \* Христос, совокупивый разстоящаяся естества. \* Тем  
веселящеса, \* Тя Богородице величаем.

Ексапостиларий утренний воскресный, единожды.

Слава и ныне, Триоди.

Подобен: Со ученики взыдем:

Взыграйте, восплещите, с веселием воспойте: коль чудная и странная Твоя  
Христе, вопиюще, дела! И кто возможет изреци Спасе могущества, Тебе, наше  
единомыслие и согласие во едину соединившаго церковь?

На хвалитех стихиры воскресны 4, глас 4:

И Триоди подобны три, глас 4.

Подобен: Дал еси знамение:

Стих: Хвалите Его в кимвалех доброгласных, хвалите Его в кимвалех  
восклицания: всякое дыхание да хвалит Господа.

В Тебе ныне радуется Церковь Человеколюбче \* Женисе и Создателе своем, \*  
сию волею Боголепною от идольския лести избавльшем, \* и Себе обручившем  
честною кровию, \* светло приемлющи священное возставление икон, \* и  
радующися Тя поет, \* и славит верно.

Стих: Исповемся Тебе Господи Боже мой, всем сердцем моим, повем вся  
чудеса Твоя.

Плоти изображение Твое возставляюще, Господи, \* любезно лобызаем, \*  
великое таинство смотра Твоего изъясняюще: \* не мнением бо, якоже глаголют  
богоборнии дети Манентовы, \* нам явился еси Человеколюбче, \* но истинною и  
естеством плоти, \* Тобою возводими к Твоей любви, и желанию.

Стих: Возвеселюся и возрадуюся о Тебе, пою имени Твоему, Вышний.

День радостный, и веселия исполненный явился днесь: \* светлость бо догмат  
истиннейших блистает, \* и сияет Церковь Христова \* украшена возставленьми икон

святых ныне, \* и изображений сияньми, \* и единомыслие бывает верных  
Богочтенное.

Таже глаголем стих, глас 6: Воскресни Господи Боже мой, да вознесется рука  
Твоя, не забуди убогих Твоих до конца.

И поем самогласен дне, глас 6:

Моисей во время воздержания закон прият, \* и люди привлече: \* Илия постився  
небеса заключи: \* трие же отроцы Авраамстии, \* мучителя беззаконнующа  
пощением победиша. \* Имже и нас Спасе сподоби Воскресение улучити, \* сице  
вопиющих: \* Святыи Боже, Святыи Крепкий, \* Святыи Безсмертныи, помилуй нас.

Слава.

Моисей во время воздержания закон прият, \* и люди привлече: \* Илия постився  
небеса заключи: \* трие же отроцы Авраамстии, \* мучителя беззаконнующа  
пощением победиша. \* Имже и нас Спасе сподоби Воскресение улучити, \* сице  
вопиющих: \* Святыи Боже, Святыи Крепкий, \* Святыи Безсмертныи, помилуй нас.

И ныне: Препоблагословенна еси Богородице:

Славословие великое. И отпуст.

Слава, и ныне, стихира евангельская, гласа.

И поучение Студитово и час 1-й в притворе. На часех, тропарь воскресен. Слава,  
Триоди: И ныне, Богородичен часов. По Отче наш, кондак воскресен. На 3-м часе,  
тропарь воскресен. Слава, святителя: И ныне, Богородичен часов. По Отче наш:  
кондаки глаголем пременяюще.

## НА ЛИТУРГИИ,

Блаженна гласа, на 4: и Триоди песнь 3-я, на 4:

**Не** ктому нечестивых еретиков ныне бровь вземлетя: Божия бо сила православие удержала есть.

**Облацы** пророчестии, животворящую с небесе днесь росу нам да кропят, на востание веры.

**Слава:** Благогласно тайныя апостолов Христовых трубы, паче естества да вопиют, честных образов исправление.

**И ныне:** Воспоим Христа, показавшаго нам царицу благочестивую, христоролюбивую, с Боговенчанною отраслюю.

По входе тропарь воскресен, гласа.

И Триоди, глас 2:

**Пречистому** образу Твоему покланяемся Благий, \* просяще прощения прегрешений наших Христе Боже: \* волею бо благоволил еси плотию взыти на Крест, \* да избавиши, яже создал еси, от работы вражия. \* Тем благодарственно вопием Ти: \* радости исполнил еси вся Спасе наш, пришедый спасти мир.

Слава, кондак воскресен, гласа.

И ныне, Триоди, глас 2. Самогласен:

**Неописанное** Слово Отчее, \* из Тебе Богородице описася воплощаемь: \* и осквернившийся образ в древнее вообразив, \* Божественною добротой смеси. \* Но исповедающе спасение, \* делом и словом, \* сие воображаем.

Прокимен, глас 4.

**Прокимен, песнь отцев:** Благословен еси Господи Боже отец наших, \* и хвально и прославлено имя Твое во веки.

**Стих:** Яко праведен еси о всех, яже сотворил еси нам.

Апостол к Евреям, зачало 329 от полу. [Евр. 11, 24—26, 32 — 12, 2.]

**Братие,** верою Моисей, велик быв, отвержеся нарицатися сын дщере фараоновы. Паче же изволи страдати с людьми Божиими, нежели имети временную греха сладость. Больше богатство вменив Египетских сокровищ поношение Христово, взираше бо на мздовоздаяние. И что еще глаголю? Не достанет бо ми повествующу лета, о Гедеоне, Вараце же и Сампсоне и Иеффаи, о Давиде же и Самуиле, и о других пророцех, иже верою победиша царствия, содеяша правду, получиша обетования, заградиша уста львов, угасиша силу огненную, избегоша острей меча, возмогоша от немощи, быша крепцы во бранех, обратиша в бегство полки чужих. Прияша жены от воскресения мертвыя своя; инии же избииени быша, не приемше избавления, да лучшее воскресение улучат. Друзии же руганием и ранами искушение прияша, еще же и уз и темниц. Камением побииени быша, претрени быша, искушени быша,

убийством меча умроша, проидоша в милотех, и в козиях кожах, лишени, скорбяще, озлоблени. Ихже не бе достоин весь мир, в пустынях скитающесе, и в горах, и в вертепах, и в пропастьех земных. И сии вси послушествовани бывше верою, не прияша обетования, Богу лучшее что о нас предзревшу, да не без нас совершенство примут. Темже убо и мы, толик имуще облажащ нас облак свидетелей, гордость всяку отложше, и удобь обстоятельный грех, терпением да течем на предлежащий нам подвиг, взирающе на начальника веры и совершителя Иисуса.

**Аллилуя, глас 8: Моисей и Аарон во иереех Его, и Самуил в призывающих имя Его.**

**Стих: Призываху Господа, и Той послушаше их.**

### **Евангелие от Иоанна, зачало 5. [Ин. 1, 43—51.]**

**В**о время оно, восхоте Иисус изыти в Галилею, и обрете Филиппа и глагола ему: гряди по Мне. Бе же Филипп от Вифсаиды, от града Андреова и Петрова. Обрете Филипп Нафанаила и глагола ему: Егоже писа Моисей в законе и пророцы, обретохом Иисуса сына Иосифова, иже от Назарета. И глагола ему Нафанаил: от Назарета может ли что добро быти? Глагола ему Филипп: прииди и виждь. Виде же Иисус Нафанаила грядуща к Себе и глагола о нем: се, воистинну Израилтянин, в немже льсти несть. Глагола Ему Нафанаил: како мя знаеши? Отвеща Иисус и рече ему: прежде даже не возгласи тебе Филипп, суща под смоковницею видех тя. Отвеща Нафанаил и глагола Ему: Равви, Ты еси Сын Божий, Ты еси Царь Израилев. Отвеща Иисус и рече ему: зане рех ти, яко видех тя под смоковницею, веруеши, больша сих узриши. И глагола ему: аминь, аминь глаголю вам, отседе узрите небо отверсто и Ангелы Божия восходящыя и нисходящыя над Сына Человеческаго.

**Причастен: Хвалите Господа с небес, хвалите Его в вышних.**

**На трапезе же ядим варение со елеем, а не рыбы. Аще же прилучится, пием вино, уставленное в славу Божию, по две чаши: Такожде и в вечер по две.**